



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՓԱՍՏԱԲԱՆՆԵՐԻ ՊԱԼԱՏԻ ԽՈՐՀՈՒՐԴ

Ո Ր Ո Շ ՈՒ Մ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՓԱՍՏԱԲԱՆՆԵՐԻ ՊԱԼԱՏԻ
ԿԱՆՈՆԱԴՐՈՒԹՅԱՆ ՓՈՓՈԽՈՒԹՅՈՒՆՆԵՐԻ ԵՎ ԼՐԱՑՈՒՄՆԵՐԻ
ՄՇԱԿՄԱՆ (ՆԱԽԱԳԾԻ ՀԱՍՏԱՏՄԱՆ) ԵՎ ԸՆԴՀԱՆՈՒՐ ԺՈՂՈՎԻ
ՀԱՍՏԱՏՄԱՆԸ ՆԵՐԿԱՅԱՑՆԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ

Հայաստանի Հանրապետության փաստաբանների պալատի (այսուհետ՝ **նաև Պալատ**) խորհուրդը, մասնակցությամբ Պալատի խորհրդի նախագահի պաշտոնակատար Հարութ Ակլունցի, խորհրդի անդամներ՝ Էմին Բեգլարյանի, Պավել Գյուլումյանի, Ռուբեն Հակոբյանի, Վարազդատ Հարությունյանի, Յուլիա Մարգարյանի, Լիլիթ Ղազանչյանի և Դավիթ Վարդիկյանի,

հաշվի առնելով Պալատի ընդհանուր ժողովին մարզերում գործունեություն իրականացնող փաստաբանների մասնակցությունը և ներգրավվածությունը բարձրացնելու անհրաժեշտությունը պայմանավորված ՀՀ փաստաբանների պալատի ընդհանուր ժողովի 2019 թվականի հոկտեմբերի 19-ի թիվ 2-Լ որոշմամբ հաստատված Պալատի կանոնադրության մեջ փոփոխություններ և լրացումներ կատարելու վերաբերյալ մշակված նախագիծը հաստատելու և այն Պալատի ընդհանուր ժողովի հաստատմանը ներկայացնելու պահանջը,

դեկլարավելով «Փաստաբանության մասին» օրենքի 10-րդ հոդվածի 4-րդ մասի 1-ին կետի և Պալատի կանոնադրության 16.5 կետի 1-ին ենթակետի պահանջներով, միաձայն

Ո Ր Ո Շ Ե Ց՝

1. Հաստատել «ՀՀ փաստաբանների պալատի կանոնադրության մեջ փոփոխություններ և լրացումներ կատարելու մասին» ՀՀ փաստաբանների պալատի ընդհանուր ժողովի որոշման նախագիծը՝ համաձայն հավելվածի,

2. ՀՀ փաստաբանների պալատի ընդհանուր ժողովի հաստատմանը ներկայացնել սույն որոշմամբ հաստատված Պալատի կանոնադրության մեջ փոփոխությունների և լրացումների նախագիծը:

Հայաստանի Հանրապետության
փաստաբանների պալատի
խորհրդի նախագահի պաշտոնակատար՝

Հարութ Ակլունց

28 օգոստոսի 2025թ.

թիվ 19/1-Լ

ք. Երևան

Հավելված՝
Հայաստանի Հանրապետության
փաստաբանների պալատի խորհրդի
28.08.2025թ. թիվ 19/1-Լ որոշման

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՓԱՍՏԱԲԱՆՆԵՐԻ ՊԱԼԱՏԻ
ԸՆԴՀԱՆՈՒՐ ԺՈՂՈՎԻ ՈՐՈՇՈՒՄԸ
«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՓԱՍՏԱԲԱՆՆԵՐԻ ՊԱԼԱՏԻ
ԿԱՆՈՆԱԴՐՈՒԹՅԱՆ ՄԵՋ ՓՈՓՈԽՈՒԹՅՈՒՆՆԵՐ ԵՎ ԼՐԱՑՈՒՄՆԵՐ
ԿԱՏԱՐԵԼՈՒ ՄԱՍԻՆ»**

1. Հայաստանի Հանրապետության փաստաբանների պալատի ընդհանուր ժողովի 19.10.2019 թվականի թիվ 2-Լ որոշմամբ հաստատված Հայաստանի Հանրապետության փաստաբանների պալատի կանոնադրության **(այսուհետ՝ Կանոնադրություն)** մեջ կատարել հետևյալ փոփոխությունները և լրացումները.

1.1. Կանոնադրության 8.1-ին կետում «ներքին իրավական ակտերի» բառերը փոխարինել «ընդհանուր ժողովի» բառերով, իսկ «ինն» բառը փոխարինել «15 (տասնհինգ)» բառով,

1.2. Կանոնադրության 8.2-րդ կետը շարադրել նոր խմբագրությամբ.

«8.2. Հաշվիչ հանձնաժողովը գործում է երեք տեղամասի (այսուհետ նաև Տեղամաս) միջոցով՝ 1) Կենտրոնական տեղամաս՝ Երևան քաղաքում- 9 (իննը) անդամի կազմով, 2) Հյուսիսային տեղամաս՝ Վանաձոր քաղաքում (եթե խորհրդի որոշմամբ այլ քաղաք չի սահմանվի)՝ 3 (երեք) անդամի կազմով և 2) Հարավային տեղամաս՝ Գորիս քաղաքում (եթե խորհրդի որոշմամբ այլ քաղաք չի սահմանվի)՝ 3 (երեք) անդամի կազմով: Հյուսիսային և Հարավային տեղամասերի (այսուհետ՝ միասին Մարզային տեղամասեր իսկ առանձին թվարկման դեպքում՝ Մարզային տեղամաս) անդամներից մեկական անդամ նշանակվում է Մարզային տեղամասի պատասխանատու, որը Մարզային տեղամասում իրականացնում է Հաշվիչ հանձնաժողովի նախագահի լիազորությունները: Հաշվիչ հանձնաժողովը չի հանդիսանում Փաստաբանների պալատի մարմին:»,

1.3. Կանոնադրության 8.3-րդ կետը լրացնել նոր նախադասությամբ.

«Հաշվիչ հանձնաժողովի անդամների նշանակման (կազմավորման) մասին որոշման մեջ նշվում են Մարզային տեղամասերում նշանակված անդամները և պատասխանատուները:»,

1.4. Կանոնադրության 8.11-րդ կետը լրացնել նոր նախադասություններով.

«Հաշվիչ հանձնաժողովի նիստերը կարող են անցկացվել նաև հեռավար կարգով: Հեռավար ձևով նիստի անցկացման ընթացակարգը սահմանում է խորհուրդը:»,

1.5. Կանոնադրության 8.15-րդ կետը լրացնել նոր նախադասություններով.

«Մարզային տեղամասում սույն կանոնադրության 8.7 կետի 6-րդ, 7-րդ և 8-րդ ենթակետերում նշված Հաշվիչ հանձնաժողովի լիազորություններն (բացառությամբ սույն կանոնադրության 15.25 կետում նշված լիազորության) իրականացնում է Մարզային տեղամասի երեք անդամից բաղկացած կազմը (այսուհետ նաև՝

Մարզային տեղամասի կազմ): Մարզային տեղամասի կազմը իրավազոր է, եթե նիստին մասնակցում է առնվազն երկու անդամ:»,

1.6. Կանոնադրության 8.16-րդ կետը լրացնել նոր նախադասությամբ.

«Մարզային տեղամասի կազմի որոշումը համարվում է ընդունված, եթե կողմ է քվեարկել առնվազն երկու անդամ:»,

1.7. Կանոնադրության 12.1-ին կետը լրացնել նոր նախադասությամբ.

«Թեկնածուներն առաջադրվում են միայն Կենտրոնական տեղամասի միջոցով:»,

1.8. Կանոնադրության 14.1-ին կետը «տարածքում» բառից հետո լրացնել «(Մարզային տեղամասերի տարածքներում)» բառերով,

1.9. Կանոնադրության 15.7-րդ կետը լրացնել նոր նախադասությամբ.

«Քվեաթերթիկների հաշվարկումը և արդյունքների ամփոփումը կարող են իրականացվել համակարգչային տեխնիկայի և համակարգչային ծրագրային ապահովման միջոցով:»,

1.10. Կանոնադրության 15.20-րդ կետը լրացնել նոր նախադասությամբ.

«Մարզային տեղամասերից քվեարկության պարկերը դրոշմվելու պահից 24 ժամվա ընթացքում հանձնման-ընդունման ակտով փոխանցվում են Հաշվիչ հանձնաժողովի նախագահին կամ Պալատի աշխատակազմի ղեկավարին:»

1.11. Կանոնադրության XV գլուխը 15.41-րդ կետից հետո լրացնել նոր 15.42-ից 15.47-րդ կետերով.

«Մարզային տեղամասերում քվեարկության կազմակերպման և արդյունքների ամփոփման առանձնահատկությունները

15.1. Փաստաբանների պալատի խորհուրդը սահմանում է այն մազերի ցանկը, որոնք ընդգրկվում են Հյուսիսային և Հարավային մարզային տեղամասերում: Փաստաբանների պալատի խորհրդի որոշմամբ ընդհանուր ժողովը կարող է կազմակերպվել և անցկացվել մեկ՝ Կենտրոնական տեղամասի միջոցով, որի դեպքում Մարզային տեղամասերը չեն մասնակցում Հաշվիչ հանձնաժողովի աշխատանքներին և քվեարկությանն առնչվող որոշումների կայացմանը:

15.2. Փաստաբանների պալատի աշխատակազմը ըստ խորհրդի որոշմամբ սահմանված Մարզային տեղամասերում ընդգրկված մարզերի, հրապարակում է ընդհանուր ժողովին մասնակցելու իրավունք ունեցող փաստաբանների ընդհանուր և Մարզային տեղամասերի ցուցակներ (այսուհետ՝ Տեղամասային ցուցակներ): Տեղամասային ցուցակում ընդգրկվում են այն փաստաբանները, որոնք գործունեություն են իրականացնում տվյալ տարածքում (մարզում): Պալատի աշխատակազմը փաստաբանների ցուցակները կազմելիս հիմք է ընդունում Պալատի կայքում նշված փաստաբանի գործունեության հասցեն:

15.3. Ընդհանուր ժողովին մասնակցելու իրավունք ունեցող փաստաբանների նախնական ցուցակը տեղամասային բաշխվածությամբ Պալատի կողմից հրապարակվում է քվեարկությունից ոչ ուշ, քան **երկու շաբաթ** առաջ: Եթե փաստաբանը նախընտրում է քվեարկությանը մասնակցել այլ վայրում, քան նշված է նախնական ցուցակում, ապա քվեարկության օրվանից ոչ ուշ, քան 7 (յոթ) օր առաջ այդ մասին դիմում է ներկայացնում Պալատ՝ նշելով իր նախընտրած վայրը, որին համապատասխան Պալատը ցուցակներում կատարում է շփոթումներ:

15.4. Այն դեպքում, երբ փաստաբանը քվեարկության է ներկայանում ոչ այն տարածքում, որի ցուցակում ընդգրկված է, Հաշվիչ հանձնաժողովի նախագահը (մարզային տեղամասի պատասխանատուն) բացառելով փաստաբանի կողմից կրկնաքվեարկության հնարավորությունը՝ թույլատրում է նրան մասնակցել քվեարկությանը՝ քվեարկող փաստաբանի համապատասխան դիմումի և մյուս տեղամասերում վերջինիս մասնակցության բացակայության վերաբերյալ տեղեկանքների հիման վրա: Սույն կետում նշված դեպքում կազմվում է լրացուցիչ ցուցակ, իսկ մյուս տեղամասի գրանցամատյանում տվյալ փաստաբանի սյունակում նշվում է այն տեղամասը, որտեղ նա քվեարկել է:

15.5. Քվեարկողների ցուցակները և քվեաթերթիկները Տեղամասերին են հանձնվում Հաշվիչ հանձնաժողովի կողմից քվեարկությունից առնվազն 24 ժամ առաջ: Մարզային տեղամասերի պատասխանատուներն ապահովում են քվեարկողների ցուցակների և քվեաթերթիկների պահպանվածությունը:

15.6. Քվեարկության արդյունքների ամփոփումն իրականացվում է սույն կանոնադրության 15.1-15.41 կետերով սահմանված կարգով, հաշվի առնելով հետևյալ առանձնահատկությունները.

1) սույն կանոնադրության 15.5. կետում նշված՝ Հաշվիչ հանձնաժողովի կողմից կազմվող թիվ 1 արձանագրությունը պարունակում է նաև Մարզային տեղամասերին տրամադրված քվեաթերթիկների թիվը.

2) սույն կանոնադրության 15.9. կետում նշված՝ Հաշվիչ հանձնաժողովի կողմից կազմվող թիվ 2 արձանագրությունը պարունակում է նաև Մարզային տեղամասերից ստացված թիվ 2 արձանագրությունների տվյալները: Մարզային տեղամասերից քվեարկության ցուցակները, սույն կանոնադրության 15.5. և 15.9. կետերում նշված թիվ 1 և թիվ 2 արձանագրությունները կազմելուց և ստորագրելուց անմիջապես հետո սկանավորվում և էլեկտրոնային եղանակով ուղարկվում են Հաշվիչ հանձնաժողովին: Մարզային տեղամասերում առկա ընտրական փաստաթղթերը տեղադրվում են ընտրական փաստաթղթերի պարկում և Մարզային տեղամասի կնիքի ու արձանագրությունների հետ միասին ոչ ուշ քան քվեարկության ավարտից հետո՝ 24 ժամում հանձնվում են Հաշվիչ հանձնաժողովի նախագահին.

3) քվեարկության արդյունքների վերաբերյալ արձանագրություն կազմելիս Հաշվիչ հանձնաժողովը հիմք է ընդունում Մարզային տեղամասերից էլեկտրոնային եղանակով ստացված արձանագրությունները.

4) սույն կանոնադրության 15.22. կետում նշված քաղվածքը Մարզային տեղամասից տրվում է պատասխանատուի և անդամներից մեկի ստորագրությամբ և Մարզային տեղամասի կնիքով:»: